

سلسلة



رواية بالعامية المصرية

دينا عماد

الحب الملعون

الحب الملعون

2012

دينا عماد

رواية بالعامية المصرية

الغلاف والخراج الفني :

احمد محمود

حقوق النشر محفوظة للمؤلفة ولايجوز اعادة
نشر هذا الكتاب او مقتطفات منه . او الاقتباس
دون ذكر المصدر . الا بموافقة من المؤلفو . ومن
يخالف هذا يعرض نفسه للمسائلة القانونية

الحب الملعون

رواية بالعامة المصرية

دينا عماد

”ماما انا نازلة“

”رايحة فين يا هالة“

”رايحة لسلمى وبعدين هنروح الكورس“

”هتتأخرى“

”لا على 10 بالكتير ان شاءالله“

فى كافييه عام

”هالة اتأخرتى ليه“

”متأخرتتش ولا حاجة...بص يا زياد انا مش هتقعد معاك اكر

من ربع ساعة علشان المرة دى لازم اروح الكورس“

”حاضر اهم حاجة انى اشوفك“

”كلمتي مامتك ولا لسه“

”ماهو انا اكدت على انى اشوفك علشان اقولك انى كلمتها“

”بجد...وقالت لك ايه“

”قالت لى طالما انى بحبك وعمايزك فهى معندهاش اى مشكلة“

”وباباك“

”لما ماما تقول اه بابا هيقول اه“

”طيب اكلم ماما بقى“

”لا استنى“

”استنى ايه“

”ماما شرطها الوحيد انى اخلص السنة دى وانجح“

”ماشى عموما هو فاضل شهر واحد بس ونمتحن... وانت شد

حيلك بقى وانجح“

”عيب عليكى...انا كل سنة بنجح“

”ماشى يا زياد انا هقوم بقى“

”طيب استنى اوصلك“

”لا انا همشى لوحدى علشان محدش يشوفنا مع بعض“

هالة بتوصل لسلمى وهى مستعجلة

”اتأخرتى كده ليه ياهالة“

”كنت مع زياد“

”والله كويس انك جيتى النهاردة...انتى لما تشوفيه بتنسى

نفسك“

”بحبه ياسلمى والوقت معاه بيجرى بسرعة“

”ياسيدى على الحب“

”بس مش انا اللى الحب ينسينى الصبح من الغلط“

”يعنى ايه... سمع كلامك“

"طيب يا ادم... سلام"

"استنى يا هالة"

"نعم"

"فكرتى"

"مانا قلت لك انى بعترك زى اخويا"

"وانا قلتلك فكرى... انا عايز اتقدملك مجرد احساسى انى

بحبك وانا صاحب اخوكى حاسس انى بخونه"

"يا ادم انت زى هيثم بالنسبة لى... جار واخ مش اكثر"

وصوت اقدام من بعيد... وهيثم يظهر

"ابه اللى موقفك كده فى البرد ده"

"مفيش كنت بسأل ادم عليك... انا طالعة"

"خذى الحاجة دى اديها لماما وانا ساعة كده وجاى"

"ماشى"

صوت جرس تليفون البيت

وقت متأخر بالليل وكلهم نايمين

صحا الاب وخرج يرد على التليفون الوحيد فى البيت

والام وراه... وقامت هالة تبص فى ساعتها لقيتها 4 ونص

الفجر

"الو...خير يا رؤوف ... لا اله الا الله... طيب الجنائزة
امتى... البقاء لله شد حيلك...مع السلامة"
الام "خير...مين مات"
الاب "خالتي توفت من نص ساعة والجنائزة بكرة الظهر"
الام "لاحول ولا قوة الا بالله... البقاء لله... انا مش هروح الشغل
بقى بكرة علشان اروح هناك من الصبح"
وندهت هالة لمامتها
"انا رايحة معاكى الصبح"
"ليه انتى مش وراكى محاضرات... بلاش تيجى انتى"
"لا انا عايزة اروح"
"خلاص تعالى... انتى حرة"
راحت هالة الصبح مع مامتها بيت المتوفاة
هى كانت ست كبيرة وهالة مش على علاقة بيها
بس هى حبت تحضر لاول مرة فى حياتها مراسم دفن
الموقف كان مؤثر خصوصا بعد الغسل والكفن
شافتهم وهما بيحطوها فى الصندوق... كانت هالة بتعيط من
غير سبب... وبعدين وصلوا للمقابر
اثناء الدفن... كان فيه ناس كتير من المشيعين
وهالة واقفة لبعيد من الزحام... الجو برد والهوا شديد

رن موبايل هالة... شافت انه رقم زياد

"الو... انتى فين يا هالة.. مجيتيش ليه لحد دلوقتى"

وبعدت هالة شوية علشان تعرف ترد من غير ما حد يلاحظ

"ايوه يازياد... انا مش جاية النهاردة... خالة بابا توفت وانا

فى الجنائز"

كانت هالة بتتكلم وهى سرحانة... وفضلت تمشى تمشى ورا

اوراق الشجر اللى بتطير على الارض

خلصت المكالمة... لقت نفسها فى وسط المقابر بس بعدت عن

اهلها

ومش شايفة حد تعرفه

الجو برد وصوت الهوا مخيف... وخصوصا انها مش شايفة

حد خالص

مسكت الموبايل تتصل بباباها او هيثم اخوها حد يلحقها

من رعشة ايدها الموبايل وقع... اتفك قطع متناثرة

بدأت تجمع... الغطاء... الجزء الامامى للجهاز... وبدأت

تدور بعينها على البطارية... شافتها كانت بعيدة شوية

عند اخر خطوة قبل ماتوصل للبطارية

اول ماداست كان غطاء قبر مكسور

وقعت هالة... وقعت جوه قبر

. 2 .

وقعت هالة... القبر مظلم... خافت... صرخت
وقعت فاقدة الوعي... لما شافت خيال بيتحرك
ظهر خيال واحدة ست وطلع الخيال من الارض
ست وشها محروق... وايديها
مدت ايديها ناحية هالة
وكان شعاع من نار امتد منها لهالة
فتحت هالة عينيها لحظة
عينيها... اشتعلت نار... وابيضت... وغمضت تانى
بعد ماخلصت مراسم الدفن
الام بتدور على هالة... مش شايفاها... راحت لجوزها
"هالة فين"
"معرفش... انا كنت واقف باخد العزا ومشفتهاش من
اول ماجينا"
"يعنى ايه؟؟؟ بنتى راحت فين"
"استنى يمكن راحت تستنانا بره"
وخرجوا يدوروا عليها بره... مش موجودة
ومسك الاب موبايله... اتصل بهالة
"شوفها هي فين"
ولما الاب لقي التليفون مقفول... سكت
"ايه... انت ساكت كده ليه"
"استنى بس... هتكون راحت فين يعنى"
"انت قفلت التليفون ليه"
"تليفونها مقفول"

"ياحبيبتى يابنتى...ياترى انتى فىن"
"متعيطيش بس علشان نعرف نفكر... هى مقالتكيش
حاجة خالص"

"كانت واقفة جنبى ساعة الجنازة...وانا كنت بدعى
ومش ببص حواليا...بس لما خلصت الجنازة ملقيتهاش"
"طيب... انا هسأل التربى اللى هنا ندور عليها...يمكن
فكرت تاهت"

ودخلوا الام والاب وسألوا التربى
"بقولك يا حاج... انا بنتى كانت معانا ومش لاقينها...
شكلها تاهت عايزينك بس تساعدنا ندور عليها"
"هى عيلة صغيرة؟؟؟"

الام "لالالا دى بنت كبيرة"
وسكت التربى شوية... وقال بهمس
"برضه...مفيش فايده"
الاب "انت بتقول حاجة يا حاج"
التربى "لالا.... تعالى معايا اشوفها لك...وخلى الست
هنا"

الام "لا.. انا عايزة اطمن على بنتى"
التربى "معلش يا ست خليكى هنا... يام محمد خليكى هنا
مع الست"
وجت مرات التربى من اوضتها وقعدت مع ام هالة
تطمئنها

مشى التربى ناحية القبر اللى وقعت فيه هالة مباشرة
"انت ماشى كده وشكلك عارف بنتى فىن...انت شفتها"
"لا ولا شفتها ولا اعرفها...ادينا بندور"
ولما وصلوا عند القبر المفتوح

عدت الايام وموضوع هالة ده اتنسى خالص
بس كل اللي يعرفها هيحس انها اتغيرت
بقت مش بتروح الجامعة ولا تقابل سلمى صاحبته كثير
وطول النهار نايمة وصاحية بالليل وكلهم نايمين
وجت الامتحانات ... وبدأت تروح امتحان كل يوم
ويوم وهى راجعة من الامتحان
قابلت ادم على سلم بيتهم... كان طالع لهيتم
"ازيك يا هالة... اخبار الامتحانات ايه"
"كويسة"
"انا بعيد عليكى كلامى تانى... لو موافقة انى اتقدمك
هتقدمك من بكرة"
"هفكر"
"بجد هتفكرى"
"ايوه... انت مش بتحبينى"
"طبعاً... بحبك اوى"
"خلاص... يبقى انا كمان بحبك"
"انا مش مصدق نفسى... اكلم هيتم يفتاح باباكي فى
موضوع الخطوبة"
"بعد الامتحانات"
"اللى تشوفيه"
وابتسم ادم بفرحة كبيرة وتعبر عن حبه الكبير ليها
ومد ايده يمسك ايدها... مدتها له هالة
مسك ايديها بفرحة وشوق... مال على ايديها يبوسها
ومضت عين هالة... بالنار... وابيضت... لحظة ورجعت
تانى لطبيعتها

وطلعوا الاتنين البيت مع بعض
نفس اليوم بالليل... جت سلمى تزور هالة
ودخلوا اوضة هالة كعادتهم لما تزور سلمى هالة
"انا مستغرباكي يا هالة"
"اليه"

"بقالك فترة ولا بتحضرى ولا بتيجى كورسات ومع
ذلك خلصتى الامتحان بدرى وخرجتى اول واحدة... ولا
تكونى محليتيش"
"بالعكس انا حليت كويس اوى... بس انا عايزة احكيلك
حاجة حصلت النهاردة"
"خير"

"ادم طلب يتقدملى وانا وافقت"
"بتقولى ايه؟؟؟وزياد وحبكم اللى بقاله 4 سنين...انتى
اكيد اتجننتى"
"انا مش عارفة ازاي قتلته كده"
"يعنى ايه؟؟حد غيرك رد عليه"
"كأن كده فعلا...بصى انا بكرة هتصل بيه واقوله اى
حاجة"

"هتقوليله ايه يعنى"
"معرفش...هقوله انى كنت غلطانة وانى مش بحبه"
"انتى اخدة الموضوع ببساطة كده...وزياد هتقوليله"
"لا طبعا او عى تقوليله انتى"
"متخافيش مش هقول حاجة...ياللا والنبي نذاكر شوية
بقى انا مش جاية ارغى"
تانى يوم الصبح...صحا الشارع كله على صوت صراخ

. 3 .

جروا كلهم على البلكونة علشان يشوفوا مصدر الصوت

منين

الصراخ جاى من بيت ادم
وفيه نار خارجة من شباك اوضته

جرى هيثم

"رايح فين ياهيثم"

"رايح اشوف صاحبي ياماما"

دقايق اخدها هيثم جرى لحد ماوصل لشقة ادم

ناس كتير فى الشقة... بس حاجة غريبة جدا

الشقة سليمة ومفيهاش اى اثر لنار

واوضة ادم مقفولة... والنار جواها

وناس كتير بتحاول تفتح الباب... والباب مقفول بشدة

وصلت المطافى... وقبل ماتبدأ فى اطفاء النار

خمدت النار لوحدها وانتهت... والباب اتفتح بسهولة

ام ادم وقعت مغمى عليها مجرد ما شافت المنظر

وكل الموجودين اصابهم ذهول... ومنهم هيثم

جثة ادم متفحمة على السرير... وملاية السرير سليمة

تماما

اتصدم هيثم من المنظر اللي شافه

رجع هيثم البيت علشان يغير هدومه ويرجع لاهل ادم

كان مصدوم لدرجة كبيرة

الام "ايه ياهيثم... الناس بيقولوا كلام غريب اوى"

هيثم "بيقولوا ايه"

الام "صحيح ادم ولع فى نفسه"
هيثم "مش عارف"
الام "مالك يابنى... متتح كده ليه"
وانهار هيثم فى بكاء متواصل
"شفت صاحبى متفحم ياماما... منظر بشع"
طيبطبت عليه الام... وكانت هالة واقفة مش بتتكلم
خالص
ولما سمعته بيقول متفحم
عينيها اضاءت بالنار... وابيضت.. ورجعت لطبيعتها فى
لحظات
الام "بس ياهيثم هو ايه اللى يخليه ينتحر... ده عارف
ربنا"
هيثم "ده مكلمنى بالليل وقالى انا فرحان جدا ومبسوط
وعايز اشوفك بكرة ضرورى بعيد عن البيت ولما سألته
ليه قالى مفاجاة هتفرحنا كلنا"
الام "يعنى ايه؟؟ منتحرش؟؟ يمكن يكون حريق عادى
ماس كهربائى ولا حاجة من دى"
هيثم "تصدقى ياماما اوضته لوحدها اللى كان فيها نار...
ومفيش اى حاجة اتحرقت غير ادم بس"
الام "ايه الكلام الغريب ده"
هيثم "اهو ده اللى حصل"
الام "مالك يا هالة... ساكتة كده ليه"
هالة "مفيش.. زعلانة علشان ادم بس"
الام "ربنا يصبر اهله... انا هقوم البس واروح لهم.. مش
جاية معايا"
هالة "لا... انا هنام منمتش من امبارح"

الام "طيب... وابقى ذاكرى يا هالة انا مش بشوفك
بتذاكرى خالص"
هالة "متخافيش... لازم هنجح"
الام "قولى ان شاءالله... وادعى ربنا ينحك"
لفت هالة وشها... وعينيها ابيضت... ورجعت تانى
لطبيعتها فى لحظات
فى بيت زياد
زياد داخل من باب البيت
"سلام عليكم... اهلااااا ازيك ياتيتة منورة"
الجدة "ازيك يا زياد... عملت ايه فى الامتحان"
زياد "تمام... كده خلصت الحمدلله... ادعيلى بقى بالنجاح"
الجدة "ربنا ينحك يا حبيبي"
زياد "ماما فين"
الجدة "فى المطبخ بتعمل القهوة... احنا اتغدينا خلاص
ادخلها تحضرلك الغدا ومتعطلهاش عن القهوة"
زياد "ماشى ياتيتة... خلى بالك هتباتى معانا النهاردة"
الجدة "لااااا انا مش بسيب بيتى عايز تيجى انت عندي
تعالى"
الام تيجى من المطبخ بصينية القهوة
"عملت ايه يا زياد"
زياد "الحمدلله ياماما... انا جعان"
الام "ثوانى هسخنلك الاكل لحد ما تغير هدموك"
الجدة "بسرة بقى تعالى علشان تقريلى الفنجان"
زياد "انتى لسه ياتيتة لازم ماما تقرالك الفنجان"
الجدة "هو فيه زى قرابتها للفنجان... تعالى جرب
وشوف"

زياد"اجرب ايه بس... ماهى عارفة عنى كل حاجة
هتقولى ايه جديد...وبعدين انا مبصدقش الحاجات دى"
الام راجعة من المطبخ
"خلاص اسكت وادخل كل... الاكل جاهز جوه"
دخل زياد اوضته وغير هدومه وبعدين دخل المطبخ
الجدة"خدى انا خلصت القهوة اقرى بقى"
الام"امممم كويس ... جايلك فلوس قريب وهتسافرى
مكان بعيد ومش باين اكثر من كده"
الجدة"مكان بعيد فين يعنى"
الام"مش عارفة بس هتركبى طيارة... والفلوس اللي
جياالك مش نقدى على فكرة"
الجدة"او مال ايه"
الام"يمكن المعاش... انتى هتصرفيهم من شباك"
الجدة"نفسى اعرف ازاي فنجانك مش بيخيب كده"
الام"يعنى انتى عارفة ان كلامى صح"
الجدة"اه طبعا...اخوكى كلمنى امبارح وهييعتلى تحويل
علشان اروح العمرة... ومحدث يعرف حاجة
غيرى...انتى عرفتى ازاي"
الام"ياماما انا مش عارفة انا بعرف ازاي...مجرد
مايبص فى الفنجان يشوف كل حاجة قدامى واضحة زى
ماتكونى بنتترجى على تليفزيون"
الجدة"بسم الله الرحمن الرحيم...تلاقيكى مخاوية زى
عمتك"
الام"مامااااا..... متتكلميش عنها كده"
الجدة"ايه يابنت... انتى هتبرقيلى... يجعل كلامنا خفيف
عليها وعليهم"

الام"معلش ياماما بس بلاش تتكلمى عنها بالطريقة دى
تانى"

الجدة بخوف" طيب طيب"

فى الكلية اثناء اعلان النتيجة

زياد"مبروك يا هالة... انتى طلعتى الاولى على الدفعة"

سلمى"وانا وانا يازياد؟؟ وانت؟؟"

زياد"نجحنا انتى مقبول وانا جيد بس انا مش عارف

الندلة دى طلعت الاولى ازاي"

سلمى"كنتى بتدحى من ورايا و عامله نفسك مش

بتذاكرى"

هالة" انا كنت عارفة انى هطلع الاولى"

وومضت عين هالة... و ابيضت... و رجعت لطبيعتها فى

لحظات

. 4 .

رجعت هالة بيتها
الام "طميننى يا هالة... عملتى ايه"
هالة "الاولى"
الام "مبروك يا حبيبتي... ده انا كنت خايفة عليكى تعيدى
السنة لانى مشفتكيش بتذاكرى خالص... اتاريكى
بتقعدى تذاكرى طول الليل"
هالة "اه"
وصوت الباب بيتفتح ويبدخل هيثم
هيثم "سلام عليكم"
الام "وعليكم السلام... بارك لاختك نجحت وطلعت
الاولى"
هيثم "مبروك يا هالة"
الام "مالكم يا اولاد... كل ما اكلم حد منكم يرد بكلمة
ويسكت هو انا هشحت منكم الكلام"
هيثم "ليه ياماما... انا عادى اهو"
الام "وانتى يا هالة متغيرة كده ليه"
هالة "انا؟؟... مفيش حاجة"
الام "بفالك كام يوم لا بتاكل ولا بتشرب يا هيثم وطول
اليوم بره مالك يابنى"
هيثم "تصدقى ياماما النيابة حفظت حريق ادم على انها
انتحار"
الام "طيب ماهو انتحار اكيد"

هيثم" لا مش ممكن ادم ينتحر... انا عارفه كويس ... انا لازم اعرف اساس الموضوع ده ومش هسكت"
واشتعلت عين هالة... وابيضت... وبعدين رجعت طبيعية
تانى

فى اللحظة اللي دخل فيها الاب من باب البيت
ودخلت هالة اوضتها... وحضرت الام الغدا... وقعدوا
يتغدوا كلهم مع بعض
فى بيت زياد

"مامااااااااااا... نجحت ياماماااااااااا"

الام"مبروك يا حبيبي... ياريتنى كنت بعرف از غرط"

زياد" انا عايز حاجة تانية اهم من الزغاريط"

الام"عايز ايه؟؟؟اللى نفسك فيه هجيبهولك"

زياد"لا مش حاجة تتجاب"

الام"اومال ايه"

زياد"انتى نسيتى اتفاقنا ولا ايه"

الام"اااااا... هالة؟؟؟"

زياد"طبعا هو فيه حاجة اهم من كده"

الام"وانا عند وعدى... حدد معاهم معاد وانا هتكلم مع

ابوك النهاردة"

زياد"تفتكرى ممكن بابا يقول اى حاجة"

الام"وهو هيقول ايه؟؟؟ملكش دعوة انت بابوك انا قلت

خلاص"

وحضن زياد مامته وهو بيشكرها

اتصل زياد بهالة

"هالة مش بتردى من اول مرة ليه"

"كنت نايمة"

"عندى ليكى مفاجأة"

"ها"

"حددى معاد مع اهلك علشان اجى انا وماما وبابا"

"اخطبط"

"طيب"

"انتى مش فرحانة؟؟؟"

"لا فرحانة"

"او مال ليه حاسس بانك عادى كده"

"مفيش حاجة... بقولك كنت نايمة"

"طيب هسيبك تنامى براحتك... بس كلمى مامتك فى"

"اسرع وقت"

"ماشى"

فى نفس اليوم بالليل

رجع هيثم من بره متأخر... وكان كل البيت مضلم

الا اوضة هالة... خبط عليها مفتحتش.. قال يمكن نامت

والنور مفتوح

دخل اوضته... غير هدومه... ودخل الحمام

وهو فى الحمام... بيغسل وشه... ووشه ناحية الحوض

حس كأن حد واقف وراه... التفت... مفيش حد

خرج من الحمام... البيت كله مضلم... راح يفتح النور

النور اتقطع... حتى اوضة هالة مضلمة

حس بخوف غريب... وكان فيه حد ماشى وراه

دخل يدور على كبريت... لقى الكبريت

ولع عود... وجاب شمعة... ومشى بيها لحد اوضته

من المطبخ لاوضته وهو حاسس ان حد وراه

دخل اوضته... ووقف الباب... وقعد على طرف السرير

كان بيثبت الشمعة جنبه... لما سمع صوت الباب
الباب بيتقفل بالمفتاح... التفت بسرعة
شبح امرأة محروقة الوجه
خاف... صرخ... صوته مطلعش
الست وكأنها هيكل... وش محروق... و عيون بيضاء
مدت ايديها... وخرج منها شعاع نار
وبدأت النار تمسك فى هيثم
بيصرخ وصوته مش بيطلع
حاول يقوم... كأنه متكفف
تانى يوم الصبح... الام بتخبط على هيثم
مش بيفتح الباب... حاولت تفتح... الباب مقفول بالمفتاح
نادت على جوزها ... الاتنين بيخبطوا ومفيش فايده
كسر الاب الباب... وقعت الام مغمى عليها
لما شافوا جثة هيثم متفحمة... وكل اجزاء الاوضة سليمة
حتى ملاية السرير سليمة تماما

فوجئ الاب بجثة ابنه المتفحمة... وكانوا الجيران سمعوا
صرخت الام قبل ما يغمى عليها
اتجمع الجيران وكل واحد يشوف المنظر.. يخاف من
بشاعته

الام انتقلت المستشفى وهالة كانت معاها
يوم الدفن كانت الام فى حالة اعياء شديدة من الصدمة
وهالة ماسكة مامتها مش سايبها لانها مش قادرة تقف
سلمى متواجدة مع هالة من يوم الوفاة
زياد حضر الجنزة باعتباره زميل هالة
اثناء الدفن... افكر التربى ابو هالة
التربى "ازيك يا استاذ"
ابو هالة بحزن "الحمد لله"
"البقاء لله... هو ده ابن حضرتك"
"ايوه"
"وبنت حضرتك اخبارها ايه"
"كويسة"

كان التربى بيدور على هالة بعينه لحد ماشافها
دور وشه بعيد عنها بسرعة بخوف
وبعد ما زياد سلم على هالة ومامتها اخذ سلمى بعيد
"انتى مش ملاحظة حاجة ياسلمى"
"ايه"

"هالة مش باين عليها اى رد فعل خالص... لا بتعيط ولا
بتصرخ ولا حتى تعبانة زى مامتها"

"يعنى اكيد ز علانة بس مش باين عليها"
"مش باين ازاي... انا شايفها عادية جدا"
"بص يازياد هي هالة بقالها فترة متغيرة معايا معرفش
ليه"

"تصدقى ومعايا انا كمان"

"انت كمان؟؟ ازاي"

"يعنى كلامها قليل اوى ويدوب بترد عليا بالعافية ده
غير انى بحس انها باردة اوى فى كل حاجة... يعنى زى
النهاردة كده دى واحدة اخوها مات"
"ايه يازياد انت بتتكلم على هالة كده ليه... انت عايز
ترجع فى كلامك ولا ايه"
"ابدا انتى عارفة انا وهالة بنحب بعض قد ايه... انا بس
بحكيك"

"طيب يالا لاحسن هالة تتضايق واحنا واقفين مع بعض
كده"

فى نفس اليوم بالليل

فى اوضة التربى ومراته

"النهاردة الراجل كان هنا بيدفن ابنه"

"وشفتها"

"اه... بس مقدرتش ابص لها... خفت منها اوى"

"والواد مات ازاي"

"انا سمعت الناس بيقولوا مات محروق"

"ومقلتلوش حاجة"

"انا اقدر اتكلم... انتى عايزانا نتأذى"

"كان المفروض تنبهه قبل مايحصل حاجة تانى"

"مقدرش... مقدرش"

"ليه"

"اسمع الكلام... روح نام جنب ابوك"

"هو فيه حاجة... انا متهيألى شفت..."

"شفت ايه؟؟؟"

"مش عارف... يمكن بيتهيألى... بس ايه اللي جابك هنا

ياماما انتى مش كنتى نايمة"

"احساس الام اللي صحانى وجابنى... اطلع من الاوضة

وسيبنى ومحدث يفتح عليا لحد الصبح"

"هو فيه حاجة"

"مش هيبقى فيه حاجة ان شاء المولى... اخرج بقى "

خرج زياد من الاوضة... وقعدت الام على السرير

وجابت ورق... وقعدت تكتب فيه كلام مش مفهوم

وحرقتة... ورمت الرماد المتبقى منه فى جميع اركان

الايضة

فى بيت زياد تانى يوم الصبح...ام زياد بتتكلم فى
التليفون
"الو... ازيك يا عمتى"
"اهلا يا نجوى ازيك"
"الحمدلله...بس عايزة احكيك على حاجة غريبة حصلت
امبارح"
"خير..انا حسيت صوتك مخضوض"
"امبارح بالليل فجأة حسيت ان فيه روح غريبة فى البيت
ولما خرجت من اوضتى قلبى اتقبض اوى من ناحية
اوضة زياد... لما دخلت الاوضة حسيت ان الباب مقفل
معايا بس قرريت عليه اتفتح معايا"
"وبعدين شفتى حاجة"
"حسيت بتقل كثير فى الاوضة ولما فتحت النور حسيت
ان اللى كان موجود اختفى"
"شفتى بعينك"
"لا حسيت"
"و عملتى ايه"
"زى ماقلتلى لما احس باى روح غريبة عملت كل اللى
كنتى قايلالى عليه"
"وحصل حاجة تانى"
"لا بس انا قلقانة اوى على زياد"
"متخافيش... لو حسيتى بأى حاجة تانى ابقى قوليلى بس
خلاص انتى كده بيتك اتحصن ومن هيدخله اى جن "

"اللهم احفظنا...والنبي يا عمتي ماتقولها كده صريحة"
"ماتخافيش ابقى ابعتلى زياد ارقيه واطمن عليه"
"حاضر يا عمتي... هجيلك انا وهو النهاردة"
"تعالوا... بس زى مانتى عارفة تيجوا وتمشوا قبل
المغرب"

"حاضر حاضر... انا عارفة"

"هستناكم...مع السلامة"

اتصال بين زياد وهالة

"ها ياهالة...كلمتى باباكى ومامتك"

"ايوه يا زياد... وبيقولوا لو يوم الخميس يناسبكم"

"اكيد طبعاً يناسبنا... احنا مستنيين انكم تحددوا معاد من
زمان ولولا اللى حصل لهيتم كام زماننا اتخطبنا من
زمان"

"خلاص يوم الخميس ان شاءالله"

واشتعلت عيون هالة...وابيضت... ورجعت لطبيعتها
تانى

"طيب مش هشوفك قبل الخميس"

"لأ... يوم الخميس"

واشتعلت عيون هالة تانى... وابيضت... ورجعت تانى

فى معاد المقابلة كان زياد اسعد حالاته

راح زياد ومامته وباباه بيت هالة

رغم الحزن الواضح جدا فى بيت هالة على الام والاب

الا انهم كانوا بيرحبوا جدا بزياد وبأهله

دخلت الام لهالة

"يالاهالة... تعالى علشان تسلمى على الناس"

"طيب"

"انتى مش فرحانة ياهالة ليه زى كل البنات"
"عادى"
"مش انتى بتقولى زميلك يعنى تعرفيه والولد من كلامه
باين انه بيحبك ببقى فيه ايه؟"
"مفيش... انا جاية اهو"
ومشيت الام ووراها هالة
اول ما دخلوا على الناس
انتفضت ام زياد... وبصت لهالة
ارتبكت هالة... وبصت لام زياد
قامت ام زياد وقفت... وهالة ثابتة فى مكانها
الاتنين ببيصوا لبعض
وكل الموجودين مستغربين وقوف هالة وام زياد
بالطريقة دى قصاد بعض
ام زياد"يالالا... احنا لازم نمشى من هنا"
ابو هالة"خير يا حاجة... فيه ايه؟؟"
ام زياد"مفيش حاجة... يالا يا زياد"
وقام ابو زياد وراها وزياد حاول يخليها تستنى... وفشل
فى بيت زياد
"ايه اللى حصل ياماما... اول ما شفتى هالة ايه اللى
حصلك"
"مش هينفع تتجوزها"
"ليه ياماما... انا بحبها"
"مستحيل... مش ممكن"
"ليه ياماما... انتى تعرفى عنها حاجة"
"هالة دى مش طبيعية... انا شفتها"
"يعنى ايه ياماما"

"مش من الانس"
"انتى بتخوفينى علشان متجوز هاش"
"لالالا انا خايفة عليك دى عايزة تأذيك"
"تأذيني ازاي"
"معرفش... كل اللي اعرفه انها مش من الانس... دى
روح شريرة"
فى اوضة التربي... وهو قاعد مع مراته
"على فكرة انا ضميرى مش مستريح"
"ليه بس"
"الراجل اللي كانت بنته وقعت فى القبر دى قلبى
وجعنى عليه اوى وهو بيدفن ابنه"
"واحنا مالنا.. ده قدر"
"بس لازم كنت اقوله اللي اعرفه من اول مرة"
"اللى حصل حصل"
"لا انا ضميرى مش مستريح... هو بييجى كل جمعة
يزور ابنه... بكرة لما بييجى لازم اقوله"

7.

فى بيت زياد تانى يوم... على التليفون
"ايه رأيك فى اللى حكيت هولك ده يا عمى... زياد مش
مصدقنى وزعلان منى"
"هو فين... هاتيه وانا اكلمه"
"لسه مجاش من الصلاة... لما بيحى هخليه يكلمك"
وقبل ماتخلص جملتها سمعت صوت زياد يفتح الباب
"اهو جه يا عمى اهو... زياد عمى عايزة تكلمك"
وجه زياد اخذ منها التليفون
"ازيك يا عمى عامله ايه؟"
"ازيك انت يا حبيبي... مزعل ماما ليه"
"انا برضه؟؟ هى اللى بتقول كلام غريب عن البنت اللى
بحبها"
"انت بتثق فيا ولا لا"
"طبعا يا عمى"
"ايه رأيك اجى انا معاك واشوف البنت بس اللى
اقول هولك تعمله بعد كده... ماشى"
"ماشى"
"كلمهم النهاردة وخذ منهم معاد تانى واعتذر عن اللى
حصل وقول ان مامتك افكرتها واحدة تانية تشبه لها
كانت حصل بينهم مشكلة قبل كده وان مامتك لما رجعت
عرفت انها اتلخبطت... وقولهم ان عمة ماما جاية معانا
علشان تعتذر"
"حاضر يا عمى"

كعادة ابو هالة... راح يزور قبر ابنه بعد صلاة الجمعة
وجه التريى قرب منه
"ازيك يااستاذ"
"الحمدلله"

"انا عايز اقولك حاجة وندمان انى مقلتهاش من زمان"
"خير... قلقتنى"
"بص يابيه... القبر اللى اللى بنتك وقعت فيه ده ملعون"
"ملعون ازاي يعنى"

"من سنين طويلة كانت فيه بنت انتحرت محروقة
واتدفنت فيه... ومكش حد ابدا بيزورها وبعد سنة جت
واحدة قعدت جنب قبرها تعيط كتير وزى طبع الستات
مراتى راحت قعدت جنبها وقعدوا يتكلموا ويحكوا مع
بعض عرفت ايه بقى؟؟"
"ها.. بكم"

"دى كانت خالة البنت المنتحرة وكانت لسه راجعة من
السفر... كانت مع جوزها بره من سنين... المهم البنت
دى ابوها وامها ماتوا قبل انتحارها ب5سنين وكانت
عايشة مع اخوها الكبير... كان بيعاملها وحش اوى
بحجة انه راجل وهى بنت... ضرب وبهدلة وخدمة ليه
ومفيش اى حاجة هى عايزاها يعملهاها... وكانت
بتشكى لخالتها ومع ذلك مكنتش قادرة تعملها حاجة...
اللى زاد بقى انها حبت واحد صاحب اخوها اوى وكان
بيعاملها كويس وفضلت مدة طويلة بتحبه فى صمت
وكل امها اليوم اللى هيطلبها من اخوها لحد مااتفاجئت

يوم انه هيتجوز...مقدرتش تستحمل الصدمة وحرقت نفسها"

"طيب كل ده ماله ومال بنتى"

"اخنا كنا بنسمع اصوات فى القبر ده... وبعد فترة لقينا غطا القبر مكسور وكل مانصلحه يتكسر سبناه... ومرة حصل نفس اللي حصل لبنتك واحدة وقعت فيه وبعدها بقوا اللي حواليتها يتأذوا واهلها جابوا حد وخرجت الروح من بنتهم من ييجى سنة... لما بنتك وقعت انا خفت اقولك بس لما عرفت ان ابنك مات ضميرى عذبنى وقلت لازم اقولك"

بعد ماخلص التربي كلامه... وقف ابو هالة مش مصدق اللي سمعه

معنى كده ان هالة هي اللي حرقت ادم وهيثم...يتصرف ازاي... يقول لمين؟؟؟

اول ما دخل بيته...كان هيحكى لمراته بس خاف

وفضل انه يستنى لما يسأل عن حد من اللي بيفهموا فى الارواح وهو اللي يتصرف

اتفاجئ بمعاد بالليل(زياد وهله)...وفضل السكوت وهو خايف وقلقان

لما وصلوا اهل زياد... والعمة...استقبلوهم اهل هالة بالترحاب

واعذرت الام زى ماعمتها قالت ... ودخلت ام هالة تنادى عليها

اول ما وصلت هالة...وقفت قدام العمة

والعمة قاعده فى مكانها تبص عليها

واشتعلت عيون هالة... وابيضت

واشتعلت عيون العمّة... وابتضت
حطت هالة ايدها على وشها... وكانت هترجع اوضتها
تانى

قامت العمّة بنطة واحدة وكانها بصحة شاب فى
العشرين

مسكتها من ايدها... وبصت للموجودين
"سيبوني مع العروسة شوية"

خرجوا كلهم من الاوضة وعلى وشهم تعابير مختلفة
ام هالة وابو زياد مش فاهمين حاجة
ام زياد وزياد فاهمين... وابو هالة مختار هي تقصد
ايه؟؟

هالة... تحولت الى واحدة محروقة
العمّة... تحولت شاب قوى بعيون حادة النظرات
وكان مازال ماسكها من دراعها
"انتى مين؟؟ وفين هالة"

"انا هنا علشان انتقم من كل الرجالة"
"ليه"

"اللى حبيتهم أدونى... يعنى مفيش حب واى حد بيحب
بيقى لازم يتحرق"

"اشمعنى هالة اللى اختارتها"

"انا مختارتش حد... هي اللى قربت من مكاني وانا كنت
مستتية اى حد علشان ألبس جسمه واقدر انتقم من اللى
أدوني وكل اللى زيهم"

"ارجعى مكانك... ومخر جيش تانى لاي حد"
"لا... لازم انتقم"

"اسمعى الكلام... واخرجى من هالة"

"لا... انا ما صدقت لقيت حد "
ومسكها الشاب وبص فى عينيها
واشتعلت العيون... وصرحت البنت المحروقة
واشتعلت نار كبيرة بلعت البنت المحروقة
هالة واقعة على الارض
والعمة رجعت لشكلها الطبيعى
نادت على ابو هالة
"شيل هالة نيمها... ولما تصحى هتلاقيها ناسية كل
حاجة عن الشهور اللى فاتت... قولولها انها كانت فى
غيبوبة ومحدث يحكى لها اى حاجة عن اللى فات لانها
مش هتفتكر حاجة خالص"
ام زياد" والروح اللى كانت لابساها"
العمة" خلاص مبقتش على الارض خالص... راحت عالم
الارواح"
ام هالة وهى بتعيط"روح ايه؟؟ انتوا بتقولوا ايه"
ابو هالة"انا هحكىلك اللى عرفته النهاردة... انا مش فاهم
حضرتك عملتى ايه يا حاجة بس انا متشكر ليكى جدا"
العمة"الحمدلله انى قدرت اريح الناس من الروح دى
لانها كانت هتفضل تحرق فى الناس للابد"
بعد شهر... كانت خطوبة زياد وهالة
وكل اللى تعرفه عن الشهور اللى فاتت
ان وقعته فى القبر سببت لها اصابة فى المخ دخلتها فى
غيبوبة
وان هيثم وادم ماتوا فى حريق واحد... قضاء وقدر



وقعت هالة... القبر مظلم.. خافت.. صرخت
وقعت فاقدة الوعي.. لما شافت خيال بيتحرك
ظهر خيال .. واحدة ست وطلع الخيال من الارض
ست وشها محروق .. وايديها مدت ايديها ناحية
هالة وكان شعاع من نار امتد منها لهالة فتحت
غادة عينيها لحظة
عينيها.. اشتعلت نار.. وابيضت.. وغمضت
تاني

